



Go tshela ka bogole

African Storybook

Sibusiso Khumalo





Vincent ke mmegakgang wa setešene sa *RX Radio*. O kwa Ntlokgaso ya *RX Radio* go gatisa lenaneo la gagwe.

Gompieno, lenaneo la ga Vincent le ka ga bana ba ba tshelang ka malwetse a a masisi.

O ba botsolotsa ka ga maitemogelo a bona ka nako ya leroborobo la *Covid-19*.



“Dumelang bareetsi, ke nna Vincent mo Ntlokgaso ya *RX Radio*. Gompieno, baeng ba me ke Mulalo, Ashley le Lina,” ga bua Vincent.

Baeng ba ikitsise.

Vincent a tswelela, “Leroborobo la *Covid-19* le ne le le kgwetlho e kgolo segolo bogolo mo bathong ba ba tshelang ka bogole. Lo bolelele bareetsi ka seo.”



Mulalo a simolola, "Ke na le bolwetse bo bo sa foleng ba koafalo ya mesifa ya mokokotlo. Bo ama mesifa ya me – maoto, matsogo, le go hema.

Fa mogare wa Khorona le jwa me di ne di ka thulana, di ka bo di mpolaile! Makgwafo a me a bokoa mme ka mogare oo nkabo ke sule!"



Lina a re, "Le nna ke ne ke tshogile. Ke na le bolwetse ba khupelo, bo kgoreletsa makgwafo.

Fa nka gotlholala kgotsa ka hema bokete, ke ne ke sa itse gore a ke asema kgotsa ke mogare wa Khorona. E kabo e nkamile mafatlha mo go botlhoko thata."



Ashley a tlaleletsa ka tshwaelo ya gagwe, "Ke na le bolwetse ba go fetoga maikutlo kgapetsakgapetsa. Bo ama boitekanelo jwa monagano wa me, mme ke tshwanetse go bo nwela molemo.

Ke nako nngwe ke ikutlwa ke tlhoafetse thata, kgotsa ke tenegile thata. Ka nako nngwe maikutlo a me a fetoga ka bonako. Go thata go laola maikutlo a me."



"Ke leboga go re bolelela ka maitemogelo a lona. A go nnile le se se molemo ka nako ya leroborobo?" Vincent a botsa.

"Ke kgonne go nna le nako e ntsi le balelapa la me. Re tshamekile mmogo metshameko ya boto, ke ne ka itumelela seo," ga bua Lina.




“Le nna ke nnile le nako e ntle le balelapa. Ka lesego ke kgonne go ikalafa mo gae,” Mulalo a araba.

“Ke ne ka nagana go dirisa nako e, jaaka tšhono ya tokafalo. Ke ne ka tshwaragana le lelapa. Ke ne gape ka boela kwa Modimong ka rapela,” ga bua Ashley.



Vincent a tlhola nako mo lebotaneng la ntlokgaso. “Ka maswabi, nako ya rona e a fela!” a bua.

“Go bana ba bangwe ba le bona ba tshwerweng ke bolwetse jwa monagano kgotsa go sa itekanela mo mmeleng, ke mafoko afe a le ka ba rotloetsang ka ona?” Vincent a botsa.



Ashley a araba wa ntlha, "Go na le ntlha e e seng nnete ka koo ya batho ba ba nang le bolwetse kgotsa bokoa ba tlhaloganyo.

O bonwa jaaka e kete o setsenwa kgotsa o batla go bonwa, mme ke batla seo se fetoge. Ga go molato fa o ikutlwa o sa siama."



Lina a dumela ka gore, "Kgakololo ya me go ba bangwe ke gore re itshole bonolo. Nna pelotelele ka bowena. O dire ka thata ka fa o kgonang."

Mulalo a tlatša, "Gape o se ke wa lapa! Go na le dikgwetlho fela o sa ntse o ka fitlhelela ditoro le dikeletso tsa gago."

—Dipotso

1. Kwala tlhaloso ya mafoko a: bolwetse, bolwetse jo bo sa foleng, ntlha e e seng nnete.
2. Batla mafoko mo kganyeng e, a a nang le bokao jo bo tshwanang le: thata, tshitshinyo, sebaka.
3. Go kaya eng go 'bonwa o na le bolwetse ba monagano kgotsa go sa itekanela mo mmeleng'?
4. O ka tshegetsa jang mongwe yo o tshelang ka bosaitekanela?
5. O nagana gore ke mathata afe a balelapa ba a itemogelang fa ba na le mongwe wa bone yo o tshelang ka bosaitekanela?
6. O bona e le maikutlo afe a go leng bothata go a laola?
7. Mulalo a re, "Ka lesego, ke kgonne go ikalafa kwa gae." A mme go babalesegile ka dinako tsotlhe go ikalafa? Tlhalosa.

Bukakanelo e ikaegile mo dipegelong tsa RX Radio. RX Radio ke seteišene sa radio ya bana ya inthanete, e dirilwe ke bana e bile e diretswe bana.

RX Radio e gasa go tswa mo Red Cross War Memorial Children's Hospital kwa Motse Kapa.

RX Radio e thusa bana go bua dikgang tsa matsapa a botlhokwa go bona.

[Etela RX Radio](#)



Ulwazi Lwethu is a Zenex Foundation funded and initiated project to develop a series of graded and leisure African language readers and teacher support materials. This project is targeted at teaching and supporting learners in the Foundation Phase to improve their home language reading and understanding. The readers have been originated in nine African languages in collaboration with Molteno Institute for Language and Literacies, Nelson Mandela Institute for Education and Rural Development, Room to Read South Africa, and Saide. All resources are developed as Open Education Resources (OER).

**basic education**Department:
Basic Education
REPUBLIC OF SOUTH AFRICA

*The Ulwazi Lwethu readers and storybooks have
been quality assured and approved by DBE.*

Your attribution should include the following:

Title: Go tshela ka bogole

Author/s: African Storybook

Translator/s: Dineo Moatshe

Illustrator/s: Sibusiso Khumalo

Assurer/s: Opelo Thole

Language: Setswana



© Zenex Foundation - Saide 2025 (Updated Edition)

CC BY includes the following elements:

BY – Credit must be given to the creator

